

四庫全書

子部

欽定四庫全書

子部

古今事文類聚前集卷十八

九

詳校官中書<sub>臣</sub>康綸鈞

侍讀<sub>臣</sub>孫球覆勘

總校官編修<sub>臣</sub>王燕緒

校對官修撰<sub>臣</sub>吳錫齡

謄錄監生<sub>臣</sub>朱鎮

欽定四庫全書

古今事文類聚前集卷十八

宋 祝穆 撰

地理部

泉 瀑布詩附見 水晶見茶門

羣書要語水本曰源源曰泉正直上出曰檻泉從上溜  
下曰下泉湧出曰瀆泉側出曰洑泉泉所出同所歸  
異曰肥泉異出同流曰漢泉 見爾雅及詩注 山下有泉蒙 易 源

泉混混

孟子

觀其流泉

劉公

地有醴泉

禮

運濯清泉以自潔

韓文

泉涓涓而始流

陶

辭飲石泉兮陰松柏

楚

辭噴若玉竇泄為

瑶池淨如醍醐瑩若琉璃

權德輿  
靈泉記

古今事實

不飲盜泉

孔子過於盜泉渴矣而不飲

尸

刺山泉湧

李廣利行軍無水拔刀刺山飛泉湧出

翻車轉水

後漢張讓趙忠說靈帝鑄天祿蝦蟇吐水於平門外橋東轉水入宮又作翻車渴烏施於橋南用灑南北郊路

飲貪泉

吳隱之性廉操為廣州刺史界上一水謂之貪泉古老云飲此水者廉士皆貪隱之至酌而飲之賦詩云古人言此水一飲懷千金試使夷齊飲終當不易心清操愈厲

所須清泉

唐潘師正居逍遙谷高宗召問所須對曰茂松清泉臣所願也

泉石膏肓

田游巖入太白山高宗幸其門謂曰先生此佳否答曰臣所謂泉石膏肓煙霞痼疾者

水樂

元結於山中尤所耽愛者有水樂是南磳之懸水淙淙

然聞於耳尤便不至南磳即懸庭前之水取歛曲竇缺之石高下承之水聲少似聽之亦便

古今文集

雜著

冷泉亭記

白居易

東南山水餘杭郡為最由郡言靈隱為尤由寺觀冷泉亭為甲亭在山下水中央寺西南隅高不倍尋廣不累丈而撮奇得要地搜勝槩物無遯形春之日吾愛其草

薰薰木欣欣可以導和納粹暢人血氣夏之夜吾愛其  
泉淙淙風泠泠可以蠲煩析醒起人心情山樹為蓋巖  
石為屏雲從棟生水與階平坐而翫之者可濯足於牀  
下卧而狎之者可垂釣於枕上矧又潺湲潔澈粹冷柔  
滑若俗士若道人眼耳之塵心舌之垢不待盥滌見輒  
除去潛利陰益可勝言哉斯所以最餘杭而甲靈隱也  
杭自郡城抵四封叢山複湖易為形勝先是領郡者有  
相里君造虛白亭有韓僕射臯作候仙亭有裴庶子棠



棣作觀風亭有盧給事元輔作見山亭及右司郎中河南元與最後作此亭於是五亭相望如指之列可謂佳境殫矣能事畢矣後來者雖有敏心巧目無所加焉故吾繼之述而不作

卓錫泉記

唐子西

人之精神亦何所不至哉揮戈可以退日搏膺可以隕霜悲泣可以頽城浩歎可以決石而況於得道者乎諸妄既除表裏皆空一真之外無復餘物則其精神之運

又何如哉吾遊羅浮至寶積之寺飲泉而甘寺僧曰此  
卓錫泉也昔梁景泰禪師始居此山其徒以無水難之  
師笑而不答已而庵成師卓錫於地泉湧數尺自是得  
井山中迄今賴之知水者以為甲於嶠南而自梁以來  
未有紀其事者夫師之為人誠不可得而知然吾聞世  
間萬有皆心想所生而古之學道未有不用定慧得者  
定則深完慧則流通以深完流通之精神而致吾心想  
中物如父之使子君之使臣有必得之勢其於此也特

未足多也或曰前世之士如李廣利耿恭之徒皆功名  
進取之人以成敗得喪為心其精神之富不踰常人而  
喑鳴叱咤飛泉為之湧溢與師無異此何理也曰二人  
者皆一時貴臣左氏所謂用物精多至於神明方其由  
於絕域之中感激奮發於萬死一生之時其用意至到  
與精進二體惟其出於一切之誠而無定慧之素以故  
得之艱勤非若師之頤指目使既捷而且逸也嗟乎事  
之不立也我知之矣志意耗於思慮聰明流於視聽則

精神所感不行於父子兄弟之間而尚何有於物苟能全吾之精神則雖山石之堅水泉之柔雍容談笑之間堅者可使闢其柔者可使激而躍也獨不得於人乎吾是以知天下之善無不可立者

龍井泉記

秦少游

龍井舊名龍泓吳赤烏中方士葛洪嘗煉丹於此事見圖經其西當西湖之西浙江之北風篁嶺之上深山亂石之水泉也每歲旱禱雨於他祠不獲則禱於此輒應

故老相傳以為有龍居之然泉者山之精氣所發也西湖深靚空濶納光景而涵煙霏菱芡荷華之所附麗龜魚鳥蟲之所依憑漫衍而不迫紆餘而成文陰晴之中各有意態而不可以言盡也故岸湖之山為所誘而不克以為泉浙江介於吳越之間一夜一晝濤頭自海而上者再疾擊而遠馳兕虎駭而風雨作過者推當者壞乘高而望之使人毛髮盡立心掉而不禁故岸江之山多為所脅而不暇以為泉惟此地盤幽而踞阻內無靡

麗之誘以散越其精外無豪悍之脅以虧疎其氣故嶺之左右大率多泉龍井其尤者也嘗有大魚自泉中躍出然後知井之有龍不謬

律詩

題山中流泉

儲光義

山中有流水借問不知名映地為天色飛空作雨聲轉來深澗滿分出小池平恬澹無人見年年長自清

野泉

張翥

遠出白雲中長年聽不窮細聲縈石亂寒色入潭空挂  
壁聊成雨穿林別起風溫泉非爾類源發在深宮

僧院引泉

姚合

泉眼高千丈山僧取得歸架空橫竹引鑿石透渠飛洗  
藥溪流濁澆花雨力微朝昏長遠看護惜似傳衣

方山寺松泉

章孝標

石脉綻寒光松花噴曉霜注瓶雲母滑漱齒伏苓香野  
客偷煎茗山僧惜淨床參禪不要問孤月在中央

石門山泉

鄭谷

一脉清泠何所之，縈莎漱蘚入僧池。  
雲邊野客窮來處，石上寒猿見落時。  
聚沫遶槎殘雪在，迸流穿樹墜花隨。  
煙春雨晚閒吟去，不復遠尋星子陂。

古詩

以下係瀑布

入廬山仰望瀑布

張九齡

絕頂有懸泉，喧喧出煙杪。  
不知幾時歲，但見無昏曉。  
閃閃青崖落，鮮鮮白日皎。  
灑流濕行雲，濺沫驚飛鳥。  
雷吼



何噴薄箭馳入窈窕吾聞山下蒙今乃林巒表物性有  
詭激坤元曷紛矯默然置此去變化誰能了

望廬山瀑布

李太白

西登香爐峯南見瀑布水挂流三百丈噴壑數千里歛  
如飛電來隱若白虹起初驚河漢落半在雲天裏仰觀  
勢轉雄壯哉造化功海風吹不斷江月照還空空空中亂  
深射左右洗青壁飛珠散輕霞流沫沸穹石而我遊名  
山對之心益閒無論漱瓊液且得洗塵顏但詣宿所好

永願辭人間

廬山瀑布

范希文

靈源何太高北斗想可挹凌日五光直逗雲千仞急白  
虹下澗飲寒劍倚天立閃電不得瞬長雷無敢蟄萬丈  
巖崖折一道林巒濕險逼飛鳥墜冷洒山鬼泣須當截  
海去濁海不相入

漱玉亭

蘇子瞻

余遊廬山南北得十五六奇勝殆不可勝

紀懶不作詩獨摘其尤者作漱玉亭三峽

橋二詩云

高巖下赤日深谷來悲風劈開青玉峽飛出兩白龍亂  
沫散霜雪古潭搖青空餘流滑無聲快瀉雙石硤我來  
不忍去月出飛橋東蕩蕩白銀闕沉沉水晶宮願從琴  
高生腳踏赤鯁公手扶白芙蓉跳下清冷中

三峽橋

同上

吾聞太山石積日穿綫溜況此百雷霆萬世與石鬪深

行九地底險出三峽右長輸不盡溪欲滿無底竇跳波  
翻潛魚震響落飛狄清寒入山骨草木盡堅瘦空濛煙  
雨間頽洞金石奏彎彎飛橋出潏潏半月鼓玉淵神龍  
近雲雨亂晴晝垂瓶得清甘可噉不可漱

漱玉亭

朱元晦

奇哉康山陽雙劍屹對起上有橫飛雲下有瀑布水崩  
騰復璀璨佳麗更雄偉勢從三梁外影落明鏡裏平生  
兩仙句詠歎深仰止三年落星灣悵望眼空眎今朝隨

杖屨得此弄清泚更誦玉虹篇塵襟諒昭洗

三峽橋

朱元晦

兩岸蒼壁對直下成斗絕一水從中來蕩滴知幾折石  
梁據其會迎望遠明滅條至走長蛇捷來翻素雪聲雄  
萬霹靂勢倒千嵒巘足掉不自持魂驚詎堪說老仙有  
妙句千古擅奇崛尚想化鶴來乘流弄明月

律詩

廬山瀑布

陸澹

正源人莫測千尺掛雲端岳色染不得神功裁亦難夏  
噴猿鳥浴秋射斗牛寒流到滄溟日翻濤更好看

瀑布

石曼卿

飛勢挂岳頂無時向此傾玉虹垂地色銀漢落天聲萬  
丈寒雲濕千巖暑氣清滄浪不足羨就此濯塵纓

廬山瀑布

李太白

日照香爐生紫煙遙看瀑布掛長川飛流直下三千尺  
疑是銀河落九天

題名水澗

陳搏

銀河瀉落翠光冷一派回環湛晚暉  
幾恨却為頑石礙琉璃滑處玉花飛

朱陵洞口水簾

畢筠

洞門千尺掛飛流玉碎珠聯冷噴秋  
今古不知誰捲得綠蘿為帶月為鉤

東山瀑布

方干

遙夜看來宜月照平明失去被雲迷  
掛巖遠勢穿松塢

擊石殘聲注稻畦素色噴成三伏雪餘波流作萬年溪  
不緣真宰能開決應向山前雜淤泥

天台瀑布

曹松

萬仞得名云瀑布遠看如織挂天台休疑寶尺難量度  
直恐金刀易剪裁噴向林梢成夏雪傾來石上作春雷  
欲知便是銀河水墮落人間合却迴

僧德殊家水簾

王介甫

淙淙萬音落石巔皎皎一派當簷前清風高吹鸞鶴唳



白日下午照蛟龍  
涎浮雲裝額自能捲  
缺月琢鉤相與懸  
朱門試問幽人價  
翡翠蛟綃不直錢

詩話

評宣宗詩

唐宣宗微時以武宗忌之遯跡為僧游方外至黃蘗與  
黃蘗禪師同觀瀑布黃蘗得一聯云千巖萬壑不辭勞  
遠看方知出處高宣宗續之曰溪澗豈能留得住終歸  
大海作波濤王者氣象可見也

詩史

評徐凝詩

世傳徐凝瀑布詩云瀑布瀑布千丈直奔入江無暫  
息萬古長如白練飛一條界破青山色東坡云至為塵  
陋又偽作樂天稱美此句有賽不得之語樂天雖涉淺  
易然豈至是哉乃戲作絕句云帝遣銀河一派垂古來  
惟有謫仙詞飛流濺沫知多少不為徐凝洗惡詩

志林

湯泉

羣書要語凡水源有石流黃其泉則溫或云神人所暖

主療人疾

博物志

暄波炎液

文選

古今事實

驪山湯泉

俗云秦始皇至驪山與神女遊而忤其旨神女唾之遂生瘡始皇怖謝神女為出湯泉而洗除後人因以為驗

辛氏三  
秦記

建華清宮

天寶六載更溫泉曰華清宮湯治井為池環山列宮室

地理志

上於華清新廣一湯制度宏麗祿山於范陽以玉  
魚龍鳬鴈石梁石蓮花以獻雕鐫尤妙上大悅命陳於  
湯中仍似石梁橫於其上而蓮花纔出於水際上因幸  
解衣將入而魚龍鳬鴈皆奮鱗舉翼狀若飛動上因恐  
却之蓮花石至今在

明皇  
雜錄

### 沸泉

主簿山在胡郎廟南數里山下有溫泉穴口周圍一丈許  
涌出如湯沸冬夏常熱

周景式  
廬山記

漢水南有溫泉周迴數

十步冬夏常沸涌若湯其熱可熟雞子未至二十里即

望見白氣衝天

梁州記

### 潮泉

雞籠山澗中有十數處累石若出人力水常深尺餘朝夕輒有湧泉溢出如潮水時刻不差朔望尤大號為潮

泉

張僧鑒  
得防記

### 半冷半溫

江乘縣東南四十里泉半溫半冷共出一壑

地記

句容縣

吳績塘有湖水半冷半熱可以淪雞皆有魚交入輒死  
雜福州雪峯及無為軍等處皆有之不能盡載

古今文集

雜著

遊湯泉記

唐子西

過水北十餘里得白水山山行一里所得佛跡院院中  
湧二泉其東所謂湯泉其西雪如也二泉相去步武間  
而東泉熱甚殆不可觸指以西泉解之然後調適可浴

意山之出二泉專為浴者計哉或說炎州地性酷烈故山谷多湯泉或說水出硫黃地中即溫初不問南北今臨潼湯泉乃在正西而炎州餘水未必皆熱則地性之說固已失之然以硫黃置水中水不能溫則硫黃之論亦未為得吾意湯泉在天地間自為一類受性本然不必有待然後溫也凡物各求其類而水性尤耿介得其類則雖數千萬里而伏流皆通非其類則橫絕徑過十字旁午而不相入故二泉之間不能容尋常而炎涼特

異如此蓋亦無足恠者吹氣為寒呵氣為溫而同出於一口此其證也臨潼之水在開元天寶時最為知名恩幸寵遇震動一時然自是以來是非口語亦紛紛矣此泉出東南萬里外非山僧野叟之所遊嬉則騷人遷客之所嘯詠而徘徊也寵辱何自而至哉為泉計者其肯以此而易彼乎

湯泉賦

秦少游

大江之濱東城之野有泉出焉直回峯負深谷分埒引



源迤邐相屬晨夜有聲涵雲注玉薄為虎鬚泚為魚目  
鱗介莫潛遇者斯浴此何水也哉野老告余曰泓泓涓  
涓莫虞歲年不火而燠其名湯泉嗚呼豈非熒惑蒞於  
上耶燭龍隱於中耶旁通咸池日御之所經耶幽精沉  
魄陰償其負耶丹砂黃硫金石之氣酷悍之所激耶德  
有常仁惠公而決寒凝海兮不冰旱焦山兮不竭其或  
燥濕外干精氣散越膚革瘡瘍憊筋淫血欣滯汨之暫  
游恍幽憂之永脫以沐則髮澤以頽則膚悅其羨流冗

浸捐棄於溝壑者猶能灌蔬稻之畦已牛馬之喝此又何其然耶吾聞天下之水厥類實繁至於弱水儲陰投羽必沉火井萃陽爛石灼金祥標醴泉病飲而瘳異紀滋穴神漢以流焦溪乏苜蓿之飾沸潭謝輦取之游其餘酒墨所發膠鹽是滋啜懷千金飲狂一國衮玉乳以中涵橫金絲而徑度詭品繆名紛莫為數咸受命於元精亦各私其所遇若夫匡廬汝水之旁尉氏驪山之下煙霏掩辱王孫烏隼之所娛金穴椒房專寵靡蔓之所

占則湯泉之中又有顯晦者焉野老忻然而笑曰善乎  
齊給之士曳杖而去行歌於塗曰畢沸滂沱奮此泉兮  
被山阿吾唯灌沐兮不知其他

書游湯泉詩後

蘇子瞻

余之所聞湯泉七其五則今三子之所游與太虛之所  
賦所謂匡廬汝水尉氏驪山其二則余之所見鳳翔之  
駱谷與渝州之陳氏山居也皆棄於窮山之中山僧野  
人之所浴猿猱之所飲惟驪山當往來之衝華堂玉甃

獨為勝絕然坐明皇之累為楊李祿山所污使口舌之士援筆唾罵以為亡國之餘辱孰甚焉今惠濟之泉獨為三子者詠嘆如此豈非所寄僻遠不為當塗者所溷而為高人逸才與世異趣者之所樂乎或曰明皇之累楊李祿山之污泉豈知惡之然則幽遠僻陋之歎亦非泉所病也泉豈無榮辱特以人意推之可以為抱器適用而不擇所處者之戒

古詩

驪宮高

白居易

高高驪山上有宮，朱樓紫殿三四重。  
遲遲兮春日玉甃暖，兮溫泉溢，嫋嫋兮秋風。  
山蟬鳴兮宮樹紅，翠華不來歲月久。  
牆有衣兮瓦有松，吾君在位已五載。  
何不一幸乎其中，西去都門幾多地。  
吾君不來有深意，一人出兮不容易。  
六宮從兮百司備，八十一車十萬騎。  
朝有宴飫暮有賜，中人之產數百家。  
未足充君一日費，吾君修己人不知。  
不自逸兮不自嘻，吾君愛人人不識。  
不傷財兮

不奪力驪宮高兮高入雲君之來兮為一身君之不來  
兮為萬民

溫泉宮

王建

十月一日天子來青繩御路無塵埃宮前內裏湯各別  
每個白玉芙蓉開朝元門向山上起城繞青山龍暖水  
夜開金殿看星河宮女知更月明裏武皇得仙王母去  
山雞晝鳴宮中樹溫泉泱泱出宮流宮使年年修玉樓  
禁兵去盡無射獵日西麋鹿登城頭梨園弟子偷曲譜

頭白人間教歌舞

惠州湯泉

蘇子瞻

積水焚大槐畜油灾武庫驚燃丞相井疑浣將軍布自  
憐耳目隘未測陰陽故鬱攸火山烈感沸湯泉注豈惟  
渴獸駭坐使癡兒怖安能長魚鱉僅可燭狐兔山中惟  
木客戶外時芒屨雖無傾城浴幸免亡國污

廬山溫泉

朱元晦

連山西南來中斷還崛起千霄幾千仞據地三百里飛

峯上靈秀衆壑下清美速茲勢力窮猶能出奇偉誰然  
丹黃歆爨此玉池水客來爭解帶萬劫付一洗當年謝  
康樂弦絕今久矣水碧復流溫相思五湖裏

自注云康樂湖中詩

云水碧輟流溫  
豈未見此水耶

律詩

湯泉

王介甫

寒泉詩所詠獨此沸如蒸一氣無冬夏諸陽自廢興人  
遊不附火蟲出亦凝冰更憶驪山下歛然雪滿塍



華清宮

杜牧

或云按唐紀明皇以十月幸驪山至春即  
還宮是未嘗六月在驪山荔支盛暑當熟  
詞意雖美而失事實

長安回首繡成堆  
山頂千門次第開  
一騎紅塵妃子笑  
無人知是荔支來

廬山湯泉

僧可遵

禪庭誰作石龍頭  
龍口湯泉沸不休  
直待衆生塵垢盡

我方清冷混常流

戲作一絕

蘇子瞻

石龍有口口無根自在流泉誰吐吞若信衆生本無垢

此泉何處覓寒溫

詩話

評黃山朱砂泉

東坡所記湯泉秦州之駱谷渝州之陳氏山居秦君之所賦東城及匡廬汝水尉氏驪山後謫居惠州遊白水

山佛迹巖浴於湯泉共有其八矣余之所見新安之黃  
山閩中之劔浦亦有其二矣第湯泉多作硫黃氣浴之  
則襲人肌膚惟驪山是礬石泉李賀詩云華清源中礬  
石湯徘徊百鳳隨君王黃山是朱砂泉圖經黃山舊名  
黥山東峯下有朱砂湯泉新可點茗春時即色微紅昔  
人題詩云三十六峯高倚天瑤臺金闕貯神仙嵩陽居  
與黃山比猶少靈砂一道泉蓋為是也

茗溪  
漁隱

### 陂渠

羣書要語匠人為溝洫九夫為井井間廣四尺深四尺  
謂之溝方十里為成成間廣八尺深八尺謂之洫注主  
通利田間之水道冬官彼澤之陂有蒲與荷詩汪汪如千  
頃陂

古今事實

復鴻隙陂

汝南有鴻隙陂郡以為饒翟方進為丞相以數溢為害  
奏罷之王莽時枯旱郡中追怨乃作童謠曰壞陂誰翟

子威飯我豆食羹芋魁言不生稻粱惟生豆芋反乎覆  
陂當復誰言者兩黃鵠託神告之也後鄧晨為汝南守  
欲修復翟方進所壞鴻隙陂聞許陽曉水耆為都水掾  
陽因高下形勢起塘四百里數年乃成

### 白公渠

白公穿渠民得其饒歌曰田於何所池陽谷口鄭國在  
前白公起後舉挿成雲決渠為雨涇水一石其泥數斗  
且溉且糞長我禾黍衣食京師億萬之口

白水陂

鄧艾於楚州開白水陂灌田又築塘四十九所

芍陂

楚相孫叔敖作期思陂灌雩婁之野號芍陂

召伯埭

謝安至新城築埭於城北後人追思之名為召伯埭

築錢塘隄

白居易為杭州刺史始築隄捍錢塘潮鍾泄其水溉田

千頃

拆磴

李栖筠傳關中仰鄭白二渠溉田而豪戚壅上游取磴利且百所奪農田十七栖筠請皆毀撤

築捍海隄

范文正公為泰州西溪鹽官嘗築捍海隄

擅塞陂塘

程明道攝上元邑盛夏塘堤大決法當言之府府稟於

漕然後計工調役非月餘不能興作先生曰如是苗槁矣民將何食救民獲罪所不辭也遂發民塞之歲則大

熟言行錄

古今文集

古詩

漢陂行

杜甫

岑參兄弟皆好奇攜我遠來遊漢陂天地黯慘忽異色  
波濤萬頃堆琉璃琉璃漫汗泛舟入事殊興極憂思集



鼉作鯨吞不復知惡風白浪何嗟及主人錦帆相為開  
舟子喜甚無氛埃鳬鷺散亂棹歌發絲管啁啾空翠來  
沉竿續蔓深莫測菱葉荷花靜如拭宛在中流勃澥清  
下歸無極終南黑半陂以南純浸山動影裊宛冲融間  
船舷暝戛雲際寺水面月出藍田關此時驪龍亦吐珠  
馮夷擊鼓羣龍趨湘妃漢女出歌舞金支樂上衆飾翠旗光  
有無咫尺但愁雷雨至蒼茫不曉神靈意少壯幾時奈  
老何向來哀樂何其多

古今事文類聚前集卷十八

欽定四庫全書

古今事文類聚前集卷十九

宋 祝穆 撰

帝系部

太上皇

羣書要語師古曰太上極尊之稱皇君也天子之父故  
號曰皇不預治國不欲言帝也

漢紀注

人之至親莫親於

父母故父有天下傳歸於子子有天下尊歸於父此人

道之極也

漢高  
詔

尊親之至莫大乎以天下養為天子父

尊之至也以天下養養之至也

萬  
章

強我懿號不若使我

為有道之君加我虛尊不若處我於無過之地

唐穆  
宗詔

古今事實

堯禪舜

堯老而舜攝

舜禪禹

舜曰格汝禹朕宅帝位三十有三載耄期倦于勤汝惟

不怠總朕師

追尊太上

秦追尊莊襄王為太上皇

請上尊號

漢高祖詔曰朕被堅執銳帥士卒平暴亂立諸侯偃兵  
息民天下大安此皆太公之教訓也朕為皇帝而太公  
未有號今上尊太公曰太上皇五日一朝太公太公家  
令曰皇帝雖子人主也太公雖父人臣也奈何人主拜

人臣如此則威重不行後俟上朝太公擁篲迎門卻行  
上大驚下扶太公太公曰帝人主奈何以我亂天下法  
帝心善家令言

置酒誇功

淮南王等朝未央宮置酒前殿上奉玉卮為太上皇壽  
曰始大人常以臣亡賴不能治產業不如仲力今某之  
業所就孰與仲多殿上羣臣皆稱萬歲大笑為樂

逍遙晚歲

唐高祖謂裴寂曰公為宗臣我為太上皇逍遙晚歲不亦善乎

置酒歸德

太宗從上皇置酒故漢未央宮上命突厥頡利可汗起舞曰胡越一家自古未有帝奉觴上壽曰今四夷入臣皆陛下教誨上皇大悅

付託得人

太宗朝突厥可汗至長安上御順天樓盛陳文物引見

上皇聞擒頡利歎曰吾付託得人復何憂哉置酒凌煙閣公卿迭起為壽

諫幸九成

太宗詔幸九成宮馬周上諫曰太上皇春秋高今所幸宮去京三百里萬一太上皇思感欲見陛下何以逮之今茲本為避暑行太上留熱處而陛下走涼處溫清之道臣所未安

遷居西內



玄宗次蜀郡皇太子即位於靈武明年還蜀居興慶

即南

內後皇后張氏稍與政事多以私謁撓權遷太上皇居

西內

降詔內禪

紹興三十二年六月丙子高宗降詔內禪上即皇帝位

太上皇移御德壽宮皇帝攀戀垂泣步出祥曦殿門冒

雨扶駕至宮門弗肯止太上麾謝再三命左右扶掖以

還

再世內禪

淳熙十六年正月辛亥上宣諭周必大等曰朕年來稍覺倦勤欲旬日間禪位於皇太子退就休養以畢高宗三年之制三月壬戌詔皇太子即位朕移御重華宮

古今文集

雜著

憲宗上順宗尊號冊文

維永貞二年歲次丙戌正月丙戌朔皇帝臣某稽首再

拜奉冊言臣聞上聖玄邈獨超乎希夷強名之極猶存  
乎罔象豈足以表無為之德光不宰之功然稱謂所施  
簡冊攸著涵泳道德感於精誠仰奉洪徽有以自竭伏  
惟太上皇帝陛下道繼玄無業纘皇極膺千載之休歷  
承九聖之耿光昭宣化源發揚大號政有崇本示儉慶  
裕格天恩翔春風仁育群品而功成不處褰裳去之付  
神器於冲人想汾陽以高蹈體堯之德與神同符其動  
也天其靜也地巍巍事表無得而言故茲寡昧屬膺大

寶懼忝傳歸之業莫申繼述之志夙夜兢畏惟懷永圖  
今天下幸安皆睿訓所被而未極徽號孰報君親是以  
台臣庶官文武之列抗疏於內方伯藩守億兆之衆同  
詞於外請因壽歷以播鴻名臣不勝大願謹上尊號曰  
應乾聖壽太上皇當三朝獻壽之辰應五紀啓元之始  
光膺徽稱允協神休斯天下之慶也

文粹

上太上道君皇帝尊號玉冊文

汪藻

維靖康元年歲次丙午八月某甲子朔某日某甲子皇  
帝臣某稽首再拜奉冊言臣聞道之大者理謝形容名  
之尊者言絕稱謂矧脫屣萬乘批糠唐虞獨超希夷事  
出倫表欲贊之美孰為端倪然應帝王之運者既同乎  
人則殫臣子之誠者烏得無述恭惟太上道君皇帝陛  
下席累聖之緒輯三神之休爰自踐履丕圖勵精求治  
克相民欲納之太和用能二十餘年德業惇恪萬物欣  
樂各成其天俯視區中無足為者廼委神器褰裳去之

明黃屋之非心聽元珠之他得全以所覆畀之冲人方  
且高蹈殊庭怡神祕錄泯雷聲於淵默凝泰定之天光  
言念父有成功必傳之子子克嗣事敢忘所天是用夙  
夜靡遑力圖報稱而羣情雖切偉範未昭幸今方內底  
寧歲豐兵卻車書文軌指日可同豈寡昧克堪實慈訓  
所致宜稽典禮仰正鴻名臣不勝大願謹奉玉寶上尊  
號曰教主道君太上皇帝伏惟太上皇帝陛下與神為  
友游物之初遵汾水而憇華胥訪廣城而追大塊玩其

清淨福我邦家億萬斯年為衆父母臣誠欣誠躍頓首  
謹言

皇帝帥羣臣詣德壽宮恭請加上太上皇帝

尊號表

周必大

臣某言近帥羣臣上表恭請加上尊號曰光堯壽聖憲  
天體道性仁誠德經武緯文太上皇帝伏奉詔答未賜  
俞允者修千二百歲而為皇時甫周於七袞觀三五六  
經而建號慶允屬於雙親事冠古今喜均家國謂俞音

之亟下何謙柄之猶持率籲羣心存于睿聽臣某誠惶  
誠懼頓首頓首臣聞仁由乎性斯能博施以無為德本  
乎誠乃可健行而不息經武故一怒而安天下緯文故  
七旬而格有苗偉哉四事之兼卓矣百王之冠飛英聲  
而騰茂實當陳漢家掌故之儀因壽歷而播鴻名更邁  
唐帝應乾之冊恭惟光堯壽聖憲天體道太上皇帝陛  
下心潛溥博身濟艱難方垂衣而視天民乃褰裳而陋  
神器享國獲寅恭之報延平昭安樂之功春秋何止於



八千甲子正踰於四百視陶唐異位之載固可萬斯小  
周室卜年之期徒能十此允謂生民之未有豈特古來  
之所稀匪行徽稱孰彰榮遇非不知功成弗處道廣難  
名縱益千言於尊崇乎何有矧加八字在揚厲以尤疎  
然而神天之祐不可虛華夏之請不可遏伏望沛然出  
令許以涓休設黃麾於大庭鏤白玉之新牒上德不德  
以有德祈勉副於輿情屢書特書不一書將繼修於慶  
禮謹再奉表陳情以聞臣某誠惶誠恐頓首頓首謹言

玉堂雜記

周必大

太上初遜位上尊號時陳丞相康伯當國集議定命學士洪景嚴遵撰議文然後降詔某時任察官心知其非而無由改乾道六年郊祀禮成加上尊號某在翰苑始引唐故事乞上率羣臣過宮表請既允然後降詔國朝止有人主上母后尊號故冊文稱嗣皇帝靖康上教主道君之號徐丞相處仁已命汪彥章藻代作冊文會有疆事不及行禮紹興三十二年初上德壽尊號乃承例

用嗣皇帝乾道六年上既表乞加上尊號而院吏寫表亦稱嗣皇帝私謂未安謹按唐明皇傳位後顏真卿議肅宗不當於宗廟稱嗣皇帝況親奉表德壽乎以白虞丞相允文丞相難之必令尋例某思建炎以後遇節朔遙拜徽宗表是時翰苑多名士必不誤用乃督吏搜舊牘明日果得表本一冊止稱皇帝又按韓文順宗實錄載憲宗上順宗尊號冊文亦稱皇帝臣某此最可據其議遂定

皇太后

羣書要語漢興因秦之稱號帝母稱皇太后祖母稱太

皇太后

漢書

親嘗稱制坤育天下

陳琳傳

為天下之母育天

下之君

孫休赦文

帝祖母稱長樂宮帝母稱長信宮

漢官儀

古今事實

三世賢后

思齊太任文王之母思媚周姜京室之婦太姒嗣徽音

則百斯男

詩

輒王諸呂

惠帝崩呂太后臨朝稱制廼立兄子呂台祿產台子通  
四人為王封諸呂六人為列侯太后崩上將軍祿相國  
產顓兵政恐為大臣所誅因謀作亂

含飴弄孫

後漢明德馬皇后云吾為天下母而身服大練食不求  
甘欲率下也但吾當含飴弄孫不能復關政

斥去靡麗

殤帝立和熹鄧后臨朝常以鬼神難徵淫祀無福乃詔有司減太官導宮尚方內省服御珍膳靡麗難成之功

始謚母后

漢世母后無謚至於明帝始建光烈之稱

蔡邕謚議

不許臨朝

魏文帝著令不許母后聽政 宋高祖遺詔曰後世若有幼主朝事一委宰相母后不煩臨朝

革唐為周

高宗晚病風不支天下事一付武后進號曰天后中宗  
即位天后稱皇太后廢帝為廬陵王自臨朝因改國號  
周自稱聖神皇帝欲以武三思為太子賴狄仁傑言卒  
復唐嗣

垂簾聽政

章獻明肅太后權處分軍國事聽斷儀式久而未定丁  
謂欲每議大政則皇太后坐後殿朝執政朔望則皇帝  
坐前殿朝羣臣其餘庶務獨令入內押班雷允恭附奏

傳命中書樞密院平決之王沂公曾時判禮儀院乃米  
用蔡邕獨斷所編東漢故事皇帝在左母后在右同殿  
垂簾中書樞密院以次奏事如儀人心乃定

王文正  
筆談

諫服袞冕

明肅太后從謁太祖詔禮官草儀佞者密請曰陛下垂  
簾尊稱山呼及輿服皆王者制度豈當以后服見祖宗  
耶遂下詔服袞冕諫疏交上薛簡肅公立朝蹇諤不文  
其談簾外口奏曰陛下大謁之日還作漢兒拜耶女兒



拜耶明肅無答是夕報罷

澠水燕談

### 還政天子

章獻明肅太后遺詔尊楊太妃為太后禁中與皇帝同議軍國事閤門促班賀於內東門御史丞蔡文忠公戒臺吏毋追班乃白宰相曰上奉先太后十餘年今始躬親政事豈宜以女后相繼耶上聞遂命刪去同議政語朝廷服其亮

皇朝類苑

章獻太后崩章惠太后欲踵之臨朝

龐籍為殿中侍御史奏燔閤門所掌垂簾儀制以沮其

謀仁宗始專萬幾

撤簾輟座

仁宗晏駕英宗即位以憂得疾大臣議請慈聖光獻太后垂簾聽政及英廟已安韓魏公琦諷后請還政後數日批出云某日更不御殿魏公亟令捲簾坐乃白上遂別議太后儀制

請還御寶

曹后稱制日韓琦欲還政天子而御寶在太后閣皇帝

行幸即隨駕琦因請具索狀祈雨比乘輿還御寶更不  
入太后閣即於簾前具述皇帝聖德都人瞻仰無不歡  
慰且言天下事久煩聖慮太后怒曰教做也由相公不  
教做也由相公琦獨立簾外不去及得一言有允意即  
再拜駕起遂促儀鸞司折簾上自此親政

孫公談圃

### 女中堯舜

英宗母宣仁聖烈皇后高氏神宗即位尊為皇太后與  
皇帝御延和殿垂簾聽政當元豐末垂簾聽政保佑哲

宗起司馬光為宰相天下歸心臨朝九年高瓊贊曰瓊與寇準協謀真宗親征戮力破敵遂成莫大之功篤生聖后為女中堯舜天實與之也

權同聽政

哲宗皇帝母曰欽成皇后朱氏神宗寢疾彌留王珪奏請宣仁聖烈皇太后權同聽政神宗首肯太皇太后垂簾於福寧殿立哲宗為皇太子神宗崩奉遺制即位尊皇太后曰太皇太后皇后曰皇太后

不御正牙

哲宗崩皇太后坐福寧殿垂簾徽宗入即皇帝位於福寧殿奉遺制皇太后權同處分軍國大事元祐二年皇太后詔曰祥禪既終典策告具有司遵用章獻明肅皇后故事予當受冊於文德殿顧予涼薄實有慙德將來受冊可止就崇政殿諭執政曰母后臨朝非國家盛事文德殿天子正牙豈女主所當御乎

古今文集

雜著

後漢后妃紀序

自古雖主幼時艱王家多釁必委成冢宰簡求忠賢未有專任婦人斷割重器惟秦平太后始攝政事故穰侯權重於昭王家富於嬴國漢仍其謬知患莫改東京皇統屢絕權歸女主外立者四帝臨朝者六后莫不定策帷帟委事父兄貪孩童以久其政抑明賢以專其威任重道悠利深禍遠身犯霧露於雲臺之上家嬰累紕於

圖杆之下湮滅連踵傾軛繼路

宋朝后妃紀序

古有攝主而秦漢以來則以母后攝國朝稱制者五章  
獻擁佑幼君政由房闈而保佑勤勞之恩為大慈聖宣  
仁德及天下欽聖昭慈功在社稷而宣仁政治比跡永  
昭其有自來矣攝政之賢自秦漢迄今未有加於我宋  
者也

尊皇太后冊文

歐陽修

維治平二年歲次乙巳十一月丁巳朔十有六日壬申  
嗣皇帝臣某謹稽首再拜言曰臣聞昔者明王之以孝  
治天下者非家至而日見也蓋有要道焉推所以行於  
已者為天下率盡所以奉其親者為天下先則四海靡  
然而承風矣洪惟有宋受命造邦百年四聖而小子獲  
承之以繼我仁考之遺休餘烈方與羣公卿士夙夜以  
思勉其不逮庶幾如我仁考付畀之意以申罔極欲報  
之心此固慄慄祇懼不敢遑寧者也顧惟眇末之質提



攜鞠育慈仁咻煦至於有成自我聖母嗣位之始哀迷  
在疚而憂勤艱難一日萬務協和綏靖保佑扶持功施  
邦家亦惟我聖母永惟至恩大德無物可稱是以稽參  
典禮率籲羣心合志一辭懇懇惓惓不勝大願謹遣攝  
太尉具官韓琦司徒具官胡宿奉玉冊金寶上尊表曰  
皇太后恭惟皇太后聖善明哲柔閒靜專自正位中宮  
內助先帝陰禮修而教行儉德著而下化遂及萬國先  
於正家逮夫玉几受遺遭時多難勉徇勤請權同聽決

而明識遠慮動懷謙畏深鑒漢家母后之失訖不踐於  
外朝及歸政冲人合於易之進退不失其正之聖是惟  
全節鉅美固已超出前古而垂法後世宜乎盛烈播於  
聲詩尊名光於典冊惟末小子獲奉溫清嗚呼殫九州  
之富以為養未足盡於孝心享萬壽之福而無疆期永  
承於慈訓臣誠懼誠忻稽首再拜謹言

皇帝加上壽皇太上皇后玉冊文

周必大

維乾道七年歲次辛卯正月丙子朔皇帝臣某謹稽首  
再拜言曰臣聞君子三樂以父母為先而王天下不與  
焉伊上古以降歷選乎列辟篤於事親虞德以盛勤於  
問安周歷斯過然則重華協帝享國永年成比屋之封  
基二南之化又何以加於孝乎豈不力鮮而功隆治邇  
而效遠哉臣以眇末之質夙奉溫清撫育教誨底於有  
成實惟我父慈母愛之恩自陟帝位於今九載勤於邦  
無盤遊之暇儉於家遵幹濯之志王政興焉德教形焉

亦惟父慈母愛之功也屬者候景初至載秩元祀奉裸  
圭而先祖聽奠瑄玉而神示格繁釐浹於縉緹大賚偏  
於華夏穰穰熙熙臣何力哉揆厥所元亦惟父慈母愛  
之德也夫天地裕於萬物萬物無裕於天地況我壽聖  
太上皇后避功於十亂得道於少廣冲虛淡泊從黃帝  
於大庭之館明識慈範豈昧陋所能稱贊乎然而三神  
之歡不可忽也臣妾之望不可缺也今鴻名顯號加於  
堯父則我聖母曷可後已是用章明具慶率籲衆心懇

懇惓惓不勝大願謹奉玉冊金寶上尊號曰壽聖明慈  
太上皇后伏惟殿下含章而亨得一而寧誕受帝祉永  
膺令名舒太陰之華婉放勲之明躬老氏之慈對如天  
之仁億萬斯年保我子孫誠懽誠抃稽首再拜謹言

皇太后受冊寶賀皇帝表 趙汝談

宸闡展敬立政之大端寶冊揚鴻奉親之令典一人有  
慶百志惟熙中賀昔者周歌思齊基命於文王之母漢  
頌長樂傳序在高皇之孫微坤不成非日不耀共惟陞

下新陟元后奄旬庶邦俛仰孳孳寤寐翼翼謂嘉珍御  
太牢享未足盡於孝心惟顯號建尊名施迺克符於公  
議諏龜協吉鏤玉推崇揭丕式以範民疾順風之偃草  
臣承乏節傳弗遑觀國之光訂美詩書第劇贊皇之德  
賀皇太后受冊表  
趙汝談

穆卜靈辰肇膺顯冊黃圖嗣慶瑤牒增輝

中賀

伏以元

氣之母為太冲三才所宗曰太極蓋皇者辭之所謂大  
而太者德之茂以加非莫隆焉疇克稱此共惟陛下輔

佐先帝保乂王家昔主饋在中已有求賢審官之志今  
御簾於外復當託孤寄命之權宜考典章之存式崇位  
號之冠兩宮慈孝四表驪寧臣久使部封逖瞻禁闥不  
獲備牛馬之走徒深懷葵藿之傾

皇太后垂簾賀表

趙汝談

嗣君踐阼式迓於今休母后垂簾率循於故典社稷有  
寄山川聿寧中賀恭惟本朝之隆最得外戚之助明肅  
之撫育仁祖光獻之擁佑英皇元祐有召彼故老之功

建中有復子明辟之燬顯仁撥亂而反正慈烈轉危而  
獲安倬有闕規著在信史共惟陛下自更大化即贊密  
謨海內誦其徽音宮中號其聖德比導敷於末命果出  
總於萬幾於乎艱哉克守常憲亦既勤止惟懷永圖必  
將修崇紀綱培固基本力行善事追配前人之光躬保  
令名聿垂後代之則教告四達觀瞻一新臣歷官四朝  
濫使諸道身雖老無所為報國有慶未嘗不怡敢陳芻  
言切効芹獻



誕皇子

羣書要語誕彌厥月

民生

五百年必有王者興其間必有

名世者

公孫丑章

或問五百歲而聖人出有諸曰堯舜禹君

臣也而並文王周公父子也而處湯孔子數百年而生  
因往以推來雖千一不可知也

古今事實

瑶光貫月

瑶光如蜺貫月正白感女樞於幽房之宮生黑帝顓頊

河圖著  
命論

履迹而生

燧人之世有大迹出雷澤華胥履之生庖犧氏於成紀

世紀帝嚳元妃姜嫄以春分玄鳥至之日從祀郊禘見大

迹履之而生后稷

世紀

虹流華渚

大星如虹下流華渚女節感而生白帝金人氏

感應錄

電繞斗樞

神農氏之末少典氏娶附寶見大電光繞北斗樞星照

郊感附寶孕二十月生黃帝於壽丘

世紀

### 十四月生

堯母慶都出觀山河奄然陰風赤龍與慶都合而生堯

春秋合誠圖

堯在孕十四月生

畧論

鈞弋夫人趙婕妤妊身十

四月生昭帝上曰昔堯十四月生命其門曰堯母門

### 感樞星生

舜母感樞星之精而生舜

尚書帝命驗

握登見虹意感而生

舜

詩含  
神霧

流星貫昴

修已山行見流星貫昴意感慄然宵坼而生禹

墨子

吞乙而孕

帝嚳少妃有娥氏女簡狄以春分玄鳥至之日祀於高  
禘有玄鳥遺卵簡狄吞之孕生契

史

白氣貫月

湯母扶都見白氣貫月意感而生湯

詩含  
神霧

謂能胎教

太任有身目不視惡色耳不聽惡聲口不出放言文王  
生而明聖君子謂能胎教

詩疏

洎于豕牢

太任洎于豕牢而生文王

國語

夢與神遇

高祖母媼嘗息大澤之陂夢與神遇時雷電晦冥父大  
公往視見蛟龍於上巳而有娠遂產高祖

夢日入懷

景帝母王皇后夢日入懷以七月七日生武帝於猗蘭

殿武帝故事

赤光照室

光武以建平元年十二月甲子夜生於濟陽縣舍有赤

光照室東觀漢記

嘉禾之瑞

光武生時有嘉禾一莖九穗縣境大熟因名秀

東觀漢記

慶雲之瑞

唐太宗生於武功之別館時有慶雲見瀰漫數里上屬於天二龍戲於館門之外水中經三日乃去

夢日而娠

太祖母昭憲皇后嘗夢日入懷而娠生之夕光照室中

夢神捧日

太宗母昭憲皇后夢神人捧日寘於懷遂有娠生帝赤光滿室

五星聚奎

真宗開寶元年十二月初二日生先是乾德六年五星如連珠聚于奎當魯分從鎮星晨見東方占曰有德受慶大人奄有四方子孫蕃昌從鎮星王者能致天下重福明年真宗生

夢日墜裾

仁宗皇帝母章懿皇后李嘗夢二日在天其一忽墜以裾承之自是有娠



夢赤腳仙

章懿李后忽夢一羽衣之士跣足從空而下云來為汝  
子時上未有嗣聞之大喜云當為汝成之是夕召幸有  
娠明年誕育昭陵而幼年每穿履襪即亟令脫去常徒  
步禁中皆呼為赤腳仙人赤腳仙人蓋古之得道李君  
也

赤光照天

秀州外醫張浩自云少隸軍籍嘗為德清閘官一日晚

出郊過嘉興縣忽覩承廳赤光照天疑為回祿亟入視之乃趙縣丞之室適免娠得雄是誕育孝宗也

揮塵錄

古今文集

雜著

生皇子賀皇帝表

王安石

宮闈嗣慶寰海交忻凡逮戴天惟均擊壤

中賀

臣聞螽

斯之言衆子實為王者之詩華封之祝多男亦曰聖人  
之事恭惟陛下紹祖休顯憲天聰明致文武之憂勤成

堯舜之仁孝宅師無競堯簞之寢既安傳類有祥弓韜  
之祠屢應貽謀方永錫羨用光臣託備藩維叨承睿獎  
丕顯奕世家實預於榮懷億萬斯年心敢忘於慶賴

降誕皇子賀皇帝表

周必大

燕媒享德方儲錫羨之祥熊夢生賢克叶會昌之運預  
在照臨之廣敷同慶賴之深中賀伏以思齊神罔時恫  
假樂民之攸暨天所保佑厥惟大如之多男國之榮懷  
亦曰成王之衆子恭惟陛下令德光乎洛浦康功茂於

岐昌鴻休無疆景命有僕蓋芣苢之薄言采采衆樂先  
成則螽斯之宜爾振振宗強孰禦臣久叨眷遇適阻進  
趨親值本支百世之盛時敢忘壽考萬年之善祝

降誕皇子賀皇帝表

周必大

高禔錫羨長嫡挺生列聖儲休三宮交賀

中賀臣聞德

如堯帝祝多子於封人聖若文王詠百男於詩雅厥今  
盛事與昔同符共惟陛下纂國丕基受天休命當藝祖  
肇邦之歲暨統元更歷之春是開蒼震之祥於赫炎圖

之永臣屏居農畝遙睇闕庭胥同四表之歡仰賴一人之慶

生皇孫賀壽皇表

周必大


有天下而傳之子初微黃屋之心受帝祉而施於孫俶  
誕青宮之胄慶均五殿喜浹萬邦

中賀

臣聞瓊幹分輝

率由於本固銀潢演潤蓋自於源深繫今日之蕃昌乃  
異時之積累世世修德則儲有羨之休親親仁民則饗  
無窮之樂盛哉豐報備此燕居共惟陛下道極際蟠心

游冲淡縣本支於百世延壽考於萬年仙李盤根笑唐  
基之未大猗蘭奕葉掩漢事而有光臣幸值邦榮屬分  
闔寄南宮北內想胥洽於宸歡左城右平悵莫陪于班  
賀



古今事文類聚前集卷十九

欽定四庫全書

子部

古今事文類聚前集卷二十一

詳校官中書<sub>臣</sub>康綸鈞

侍讀<sub>臣</sub>孫球覆勘

總校官編修<sub>臣</sub>王燕緒

校對官修撰<sub>臣</sub>吳錫齡

謄錄監生<sub>臣</sub>朱鎮

謄錄監生<sub>臣</sub>施華

欽定四庫全書

古今事文類聚前集卷二十

宋 祝穆 撰

帝系部

皇帝登極

潛龍舊地潛龍舊學潛龍故人附

羣書要語嗣無疆大歷服

大誥

昭哉嗣服

下武

九五飛龍在

天大人造也

卦乾

聖人作而萬物覩

同上

履帝位而不疚光

明也

履

大人以繼明照四方

離

聖人大寶曰位何以守



位曰仁何以聚人曰財

繫辭

踐阼臨祭祀內事曰孝王某

外事曰嗣王某

曲禮

潛龍舊地接閑白水列宅舊鄴

范雲遜表

河南帝城多近臣

漢紀

西京多豐沛故人東都亦南陽多顯

陳書宗室贊

潛龍舊學翊弦誦於春宮

唐大詔令

潛龍故人翼龍而飛既濡其雨露刑馬而誓已表於山

河

唐李丕制

古今事實

御王冊命

乙丑成王崩太保命仲桓南宮毛俾爰齊侯呂伋以二  
干戈虎賁百迎子釗於南門之外延入翼室恤宅宗丁  
卯命作冊度王麻冕黼裳由賓階躋太保承介圭上宗  
奉同琚由阼階躋太史秉書由賓階躋御王冊命曰皇  
后憑玉几道揚末命命汝嗣訓臨君周邦率循太王變  
和天下用答揚文武之光訓王再拜興答曰眇眇予末  
小子其能而亂四方以敬忌天威

三讓再讓

高祖崩大臣使人迎代王代王報太后計猶豫未定卜之兆得大橫占曰大橫庚庚余為天王夏啓以光代王乃遣太后弟薄昭見勃等具言所以迎立王者昭還報曰無可疑者代王乃令宋昌驂乘至渭橋羣臣拜謁稱臣代王下拜勃乃跪上天子璽代王謝曰至邸而議之羣臣從上議代王曰奉高帝宗廟重事也寡人不足以稱羣臣固請代王西鄉讓者三南鄉讓者再丞相平

等皆曰臣等為宗廟社稷計不敢忽願大王幸聽遂即  
天子位

魂魄思沛

以下係潛  
龍舊地

漢高過沛作歌慷慨傷懷曰遊子思故鄉吾萬歲後魂  
魄猶樂沛也其以沛為湯沐邑復其民世世無所與

豐有粉社

漢豐邑有粉社章和元年幸梁遣使祠沛高原廟注粉  
白榆也

雞犬識豐

漢高祖以太上思豐沛故作入新豐道路一如豐沛人家雞犬放之皆識家

芒碭雲氣

高祖隱芒碭山澤所居上常有雲氣求常得之

常遊鄠杜

漢宣帝為皇曾孫喜游俠鬪雞走馬數上下諸陵周徧二輔嘗困蓮勺鹵中尤樂鄠杜之間率常在杜下

望氣鬱蔥

光武紀初謁者蘇伯阿望春陵氣鬱鬱蔥蔥

復一年租

魏文詔潁川先帝所由起兵征伐也官渡之役四方瓦解遠近顧望而此郡守義丁壯荷戈老弱負糧復潁川郡一年田租

龍潛舊宅

唐興聖寺高祖龍潛舊宅也武德元年以為通義宮六

年高祖臨幸大宴羣臣引見鄰里父老頒賜有差貞觀元年立為高宗寢室

臨幸故鄉

唐貞觀十五年并州僧道老人等抗表以太原王業所因明年登封已後願時臨幸上賜宴從容謂曰飛鳥過故鄉猶躑躅徘徊况朕於太原起義兵遂定天下復小遊觀誠所不忘岱禮若畢或冀與公等相見

飛龍之瑞

初上在潛邸與宋王等同居於興慶里時人號曰五王子宅本名隆慶坊及景龍末宅內有龍池涌出望氣者云有天子之氣中宗數幸其地命泛舟仍馳象踏氣以厭之竟為飛龍之地因是地立興慶宮玄宗開元十年幸潞州改舊宅為飛龍院

建寺錫名

西京應天寺本後唐夾馬營大中祥符二年以太祖誕聖之地建寺錫名東京啓聖院本晉護聖營以太宗



誕聖之地太平興國六年建寺錫名

帝王之師

以下潛龍舊學

黃帝師風后顓頊師老彭帝嚳師祝融堯師務成昭舜  
師紀后禹師墨如湯師伊尹文武師姜尚周公師庶秀  
孔子師老聃此十一君皆聖人也猶待學問王符潛夫論或  
云黃帝師力牧顓頊師樛圖帝嚳師赤松子

三聖舊學

堯學於君疇舜學於務成昭禹學於西王國荀子

高宗舊學

高宗曰予小子舊學于甘盤

說命

東宮舊僚

張說始為玄宗東宮侍講三秉大政左右王化封泰山  
祀睢上謁五陵開集賢修太宗之政皆說為首

從鄉校學

太祖初受學於鄉先生辛文悅每歸令羣兒前導人往  
往避之

豐沛故人

以下係潛龍故人

沛公初起相工入豐沛之市云多封侯之人

意林論衡

同居豐邑

盧綰與高祖同居豐邑

微時博奕

陳遵祖父遂字長子宣帝微時與有故相隨博奕數負及宣帝即位遂為太原太守乃賜璽書曰太守官尊祿厚可以償博矣

客侵帝座

嚴光少與光武同遊學及光武即位以物色訪之引入  
論道舊故因共偃卧光以足加帝腹上明日太史奏客  
星犯御坐

嘗同研席

劉弘字和季家南陽與光武同居永安里又同年共  
研席

嘗給資用

光武初學長安往來南陽資用乏與同舍生韓子合錢買驢令從僦以給諸公之費

嘗留講論

光武學長安時過朱祐留上待講竟夕談話及帝登位幸祐第問曰得無忘我講乎祐曰不敢

同居白水

吳漢與光武同居白水鄉

思報一飯

馮異自長安入朝帝謂公卿曰是我起兵時主簿也為  
吾披荆棘定關中賜珍寶錢帛曰蕪婁亭豆粥滹沱河  
麥飯久不報

為置守冢

張安世兄賀為掖庭令收養宣帝後為賀置守冢三十  
家

久同軍旅

魏太祖表郭嘉曰昔在軍旅十有餘年行同騎乘坐同

幄席

微時戲言

始梁高祖遇任昉於竟陵王西邸從容曰我登三府當以卿為記室昉亦戲高祖曰我登三事當以卿為騎兵以高祖善射也後齊以梁高祖為大司馬錄尚書事以昉為司馬下記室

白首相見

薛振字元超收之子高宗謂元超曰我昔在春宮與卿

俱少壯倏忽已三十年與卿白首相見歷觀書傳共白

首者幾人

行狀

能識居潛

祖宗居潛與趙韓王遊長安時陳搏乘一騾過之下騾  
大笑巾簪幾墜左手握太祖右手挽太宗曰可相從市  
飲乎祖宗曰與趙學究三人並遊可同之陳睥睨韓王  
甚久徐曰也得也得非渠不可與此帝既入酒舍韓王  
脚踏偶坐席右陳怒曰紫微帝垣一小星輒據上次可



乎斥之使居帝左

湘山野錄

古今文集

雜著

順宗即位冊文

維貞元二十一年歲次乙酉正月辛未朔二十三日癸巳皇帝若曰於戲天下之大實為重器祖宗之業允屬元良咨爾皇太子誦睿哲溫恭寬仁慈惠文武之道秉自生知孝友之誠發於天性自膺上嗣毓德春闈恪謹

于厥躬祇勤于大訓必能誕敷至化安勸庶邦朕寢疾  
彌留弗興弗寤是用命爾繼統俾紹前烈宜陟元后永  
綏兆人其令中書侍郎平章事高郢奉冊即皇帝位  
爾惟奉若天道以康四海懋建皇極以熙庶功無忝我  
高祖太宗之休命

登極賀皇帝表

趙汝談

入纂聖緒曾不崇朝出膺瑤圖遂奠衆志亶惟天授篤  
匪人謀中賀伏以先皇帝以皇極子萬民以至公家六

合儲號未正寢疾彌留遺命大臣致位明辟恭惟陛下溫  
恭而履度寬裕而養冲繇文子孫嗣大歷服如玉韞石  
虹氣隱乎山川及雲升天龍澤沛乎宇宙神祇悅豫內  
外攸寧夫勃興者非常之原難報者罔極之德昔代王  
迎至漢邸跪以璽符而遜辭曾孫詔養掖庭乘之輶獵  
而祇懼飭躬行化虛已禮賢率能功光祖宗澤浹黎庶  
見號七制追蹤三王肆予阜陵迪我高廟因心則友不  
間乎兄弟之情遵道而行相輝乎父子之懿掩前猷而

絕出尤近事之可師願留聖恩以幸天下臣忝國疏屬  
荷朝厚恩雖將指西馳弗獲旅應門之右然傾心東向  
猶及賓暘谷之初忻戴之私倍百倫品

登極賀皇太后牋

趙汝談

乾旋坤轉大策定於禁中山高日昇重明照乎天下萬  
邦改觀百辟承風中賀恭惟殿下德為聖人功配冲子  
再拜壓紐陰獨察其休祥五色補天衆莫窺其妙用決  
幾於眇綿之頃運化於垓比之間神器不搖景命有僕

臣叨官舊服幸際新朝制房闥而晏然已仰政權之重  
戴旌旗而祇見方觀孝治之隆

雜著

係潛龍  
故人

玄宗明姜皎詔

係故人

姜皎精微用心寬厚朕往居藩邸潛歛風雲亦猶彭祖  
之同書子陵之共學朕嘗遊奕於外至長楊鄠杜之間  
皎於此時與之累宿私謂朕曰太上皇必登九五王必  
為儲副凡如此者數四朕叱而後止寧知非僕雖玩於

鄧晨可收護軍遂訶於朱祐太上皇聞之遽奏於中宗  
孝和皇帝尋遣號王邕等鞠皎保護無怠詞意轉堅李  
通之讖記不言田叔之髡鉗罔憚仍為宗楚客紀處訥  
等密奏請投皎炎荒中宗特降恩私左遷潤州長史讒  
邪每構忠懇愈深戴于朕躬祇膺寶位又共剪奸臣拜  
以光寵不忘撝挹補朕之闕斯人孔臧而悠悠之談噉  
噉共作醜正惡直竊生於謗考言詢事益亮其誠昔昭  
帝之保霍光魏太祖之明程昱朕之不德庶幾乎此

聖壽

羣書要語五福一曰壽

洪範

萬壽無疆

七

君子萬年介爾

景福

既醉

如南山之壽

天保

故大德必得其位必得其祿必

得其名必得其壽

中庸

天錫皇帝與天齊壽

韓文

上古有大

椿以八千歲為春八千歲為秋

逍遙篇

王母出桃五枚與

武帝曰此桃三千年結子

漢武故事

古今事實

古帝壽數

黃帝百十歲少昊百歲顓帝九十八歲帝嚳百歲堯帝百十八歲帝舜禹湯皆百歲文王九十七歲武王九十

三歲

韓愈佛骨表

### 華封三祝

華封人請祝聖人壽堯曰辭使聖人富堯曰辭使聖人多男子堯曰辭封人曰壽富多男子汝獨不欲何也堯曰多男子則多懼富則多事壽則多辱是三者非所以

養德也故辭

莊天



夢與九齡

文王謂武王曰汝何夢矣對曰夢帝與我九齡文王曰古者謂年齡也我百爾九十吾與爾三焉

天子萬壽

江漢召穆公美宣王虎拜稽首天子萬年又云作召公考天子萬壽

昌熾壽艾

閼宮頌魯僖公曰三壽作朋如岡如陵又俾爾昌而熾

俾爾壽而富黃髮台背壽眉與試俾爾昌而大俾爾耆  
而艾萬有千歲眉壽無有害

稱壽寓規

昔齊桓公與管仲鮑叔牙甯戚四人飲桓公請叔牙曰  
盍起為寡人壽叔牙奉觴而起曰願公無忘在莒時使  
管仲無忘於束縛於魯時使甯戚無忘於飯牛車下時  
未央為壽

凌煙為壽

並見上  
皇門

嵩呼萬歲

武帝詔朕親登崇嵩御史乘屬在廟旁吏卒咸聞呼萬  
歲者三

奉觴上壽

武帝東封泰山還登明堂兒寬上壽曰癸亥宗祀日宣  
重光上元甲子肅邕永享見象日昭報降符應臣寬奉  
觴再拜上千萬歲壽制曰敬舉君之觴

獻千秋鏡

明皇以降誕日燕百僚於花萼樓下百僚表請每年八月五日為千秋節改千秋節為天長節百僚上壽王公以下獻鏡及承露囊唯張九齡獻千秋金鏡錄五卷言前古興廢之道玄宗賞異之

不立為節

明皇及肅宗以後皆以生日為節德宗不立節止於羣臣稱觴上壽而已

古今文集

雜著

天申節賀表

周必大

天生民而立之君茂啓中興之運臣歸美以報其上共

欣載夙之期

中賀

恭惟陛下配德乾坤合明日月御赫

赫炎炎之祚成巍巍蕩蕩之功當樞電之呈祥舉華夷

而賴慶嚴恭寅畏而自度已迪哲於四人虛靜恬淡而

無為方成純於萬歲臣猥司外闡阻造近班使壽使富

而多男願上堯封之祝宜民宜人而受祿載賡周雅之

章

端慶節賀表

趙汝談

社鼓斗樞赫聖朝之誕節川珍嶽貢湊良月以畢來惟  
君萬邦受天百祿中賀恭惟陛下凝旒思道畢服圖功  
恢大德以保民而遠人爭致順附單小心於事帝而否  
數轉為嘉祥率土謳歌望雲祈戴願躡九皇之軌歲稱  
萬壽之觴臣屬庀外司阻班庭賀獻書金鏡老非翰墨  
之才通表銀臺遠有韶鈞之夢

誕節受賀

唐穆宗即位之初詔曰七月六日是朕載誕之辰其日百寮命婦宜於光順門進名參賀朕於門內與百寮相見明日又勅受賀儀宜停先是左丞韋綬奏行之宰臣以古無降誕受賀之禮奏罷之然次年復行賀禮誕節之制起於明皇令天下宴集休假二日肅宗亦然代德順三宗皆不置節名及文宗以後始置宴如初則受賀一事蓋自長慶年至今用之也

容齋隨筆

律詩

千秋節有感

杜甫

自罷千秋節頻傷八月來  
先朝常宴會壯觀已塵埃  
鳳紀編生日龍池塹劫灰  
衢尊不重飲白首獨餘哀

又

御氣雲樓敞含風彩仗高  
仙人張內樂王母獻宮桃  
羅韞紅蕖艷金羈白雪毛  
新街銜壽酒走索背秋毫

壽寧節

王元之



待漏齊趨聖節筵雲開金闕上青天  
平明引入長生殿  
共祝堯雲百歲年

又

數聲飛電響鳴鞘香裊金爐映赭袍  
王母親承玉皇詔  
年年今日進蟠桃

又

簾前可愛三冬日堦下新抽七葉蓂  
昨夜靈臺因預奏  
綵雲高捧老人星

又

益算真君南斗高還因聖節奏天曹扶桑枯盡靈椿老  
始放堯眉出壽毫

宮詞

太皇生日最尊榮獻壽宮中未五更天子奉觴仍再拜  
寶慈

太后  
宮名

侍立到天明

皇后

羣書要語天子之配謂之后后者君也

白虎通

天子后立

六宮三夫人九嬪二十七世婦八十一御妻

禮記

按夏殷

以前后妃之制其文畧矣大率稱妃周則天子立后正

嫡曰王后秦稱皇帝正嫡曰皇后漢因之

初學記

聽天下

之內治以明章婦道故天下內和而家理婦順不修陰

事不得謫見於天月為之食則后素服而修六宮之職

蕩天下之陰事

禮記

內宰治王內之政令以陰禮教六宮

以陰禮教九嬪以婦職之法教九御

周禮

關雎后妃之德

也風之始也所以風天下而正夫婦也周南召南正始

之道王化之基是以關雎樂得淑女以配君子憂在進

賢不淫其色哀窈窕思賢才而無傷善之心焉是關雎

之義也

序

大躬儉節用服澣濯之衣

葛覃

又當輔佐君子求

賢審官知臣下之勤勞內有進賢之志而無險陂私謁

之心朝夕思念至于憂勤也

卷耳

言若螽斯不妒忌則子

孫衆多也

螽斯

和平則婦人樂有子矣

采芣苢

靜女其嬈貽我

彤管彤管有煒說懌女美注古者后夫人必有史彤管

之法史不記過其罪赦之后妃羣妾以禮御於君所女

史書其日月授之以環以進退之生子月辰則以金環退之當御者以銀環進之著于左手既御著于右手事

無大小記以成法詩故陳賢妃正女夙夜警戒相成之

道焉雞鳴皇后稱椒房取其實蔓延盈升以椒塗室取溫

暖除惡氣也猶天子朱泥殿上曰丹墀漢官儀天子親耕

以共粢盛王后親蠶以共祭服穀梁傳男正位乎外女正

位乎內一正家而天下定矣卦家人壺政穆宣房樂韶理

坤則順成星軒潤飾注儀禮有房中樂后夫人諷誦以

事君子星軒軒轅星也

顏延之宋  
皇后哀冊

有司奏立長秋宮

馬后

傳以皇后為長秋者秋陰之始取其長而欲其久也

宋百

官志漢魏故事皇后六駟馬

初學記

古今事實

嬪于虞

有鰥在下曰虞舜帝曰我其試哉女于時觀厥刑于二女  
釐降二女于為汭嬪于虞

曰嬪于京

摯仲氏任自彼殷商來嫁于周曰嬪于京乃及王季維德之行

天作之合

文王初載天作之合在洽之陽在渭之涘文王嘉止大邦有子大邦有子覲天之妹文定厥祥親迎于渭造舟為梁不顯其光有命自天命此文王于周于京續女維莘長子維行篤生武王保佑命爾變伐大商

晏起待罪

周宣王夜卧而晏起姜后既出乃脱簪珥待罪使其傅  
母通言於宣王曰妾之淫心見矣至使君王失禮而晏  
起亂之興從婢子起敢請罪王曰寡人不德實自生過  
非夫人之罪也遂復姜后而勤於政事早朝晏退卒成  
中興之名

國語

#### 四殆諫王

鍾離春者齊無鹽邑之女也為人極醜自詣宣王願乞  
一見宣王召見之乃舉手拊膝曰殆哉殆哉宣王曰願



聞命對曰今西有橫秦之患南有強楚之讎春秋四十壯勇不立一殆也漸臺五層萬民疲困二殆也賢者伏匿山林諂諛強於左右三殆也酒漿流湏以夜繼日女樂俳優縱橫大笑四殆也宣王喟然而歎拜無鹽女以

為王后

列女傳

諫用諛佞

齊威王即位其佞臣周破胡專權擅勢嫉賢妒能虞姬謂王曰破胡諛佞不可不退王乃封即墨大夫以萬家

烹阿大夫與周破胡齊國大治

列女傳

夢龍貴徵

漢虜魏王豹薄姬輸織室漢王詔納後宮歲餘召幸之  
對曰昨夢龍據妾背上曰是貴徵也吾為汝成之遂幸  
生文帝

拳手即伸

鈎弋夫人趙婕妤家在河間武帝巡狩過之望氣者言  
此有奇女天子亟使使召至女兩手皆拳上自披之手

即時伸由此得幸號拳夫人居鈎弋宮遂生昭帝

捫天吉兆

和熹鄧皇后和帝后也太傅禹之孫嘗夢捫天蕩蕩正青若有鍾乳狀乃仰漱飲之以訊諸占夢言堯夢攀天而上湯夢及天而咭之斯皆聖主之別占吉不可言

沙麓之祥

春秋沙麓崩注陰盛而崩元城建公曰沙麓崩六百四十五年宜有聖女興漢王賀字翁孺正值其地日月當

之賀生禁禁生元后元后母李妊政君夢月入懷政君  
元后小字也元后母天下自元成哀平四帝至王莽揚  
雄作表太陰之精沙麓之靈作合於漢配元生成元后傳

### 金屋貯婦

武帝為膠東王年數歲長公主抱問曰兒欲得婦不曰  
欲得指女阿嬌好不笑曰若得阿嬌當作金屋貯之漢武  
故事

### 毒殺許后

宣帝始立微時許妃為皇后光夫人顯愛小女成君欲  
貴之私使乳豎淳于衍行毒藥殺許后因勸光納成君  
為皇后光薨後語稍泄於是上始聞之禹山雲日見侵  
削數相對涕泣自怨於是始有邪謀會事發覺雲山同  
日自殺禹要斬顯及諸女昆弟皆棄市獨霍后廢處昭  
臺宮與霍氏相連坐誅滅者數千家

娶陰麗華

漢光武陰皇后南陽人名麗華初光武聞后美心悅之

後至長安見執金吾車騎甚盛因歎曰仕宦當作執金  
吾娶妻當得陰麗華即位立為后

本紀

### 相得其人

晉簡文帝無子令善相者以諸愛妾示之皆云非其人  
時李后為宮人在織坊中形長而色黑皆謂之崑崙既  
至相者驚曰此其人也帝召之侍寢后數夢兩龍枕膝  
日月入懷帝聞而異焉遂生孝武帝

### 一夜齒生

晉成帝杜皇后預之曾孫成帝拜為皇后少有姿色長  
猶無齒有求婚者輒中止及帝納采之日一夜齒盡生

素柰不祥

見國哀門

賢女必學

甄后九歲喜書視字輒識數用諸兄筆研兄謂后言汝  
當習女工用書為學作博士耶后言古賢女未有不學  
前世成敗以為己誠不知書何由見之

魏志

玉衣覆寢

甄后幼時每寢寐家中髣髴見如有人持玉衣覆其上者常共恠之

魏志

著書垂範

唐太宗長孫皇后少好讀書正位中宮務崇節儉上嘗與之議賞罰后辭曰牝雞之晨惟家之索妾婦人安敢豫聞政后嘗采自古婦人得失事著為女則三十卷及崩宮司奏聞上覽之悲慟以示羣臣曰皇后此書足以垂範百世朕非不知天命而為此無益之悲但入宮不



復聞規諫之言失一良佐故不能忘懷耳

陛下家事

高宗欲立武昭儀為皇后畏大臣異議未決召勣等計之勣稱疾不至帝後密訪勣答曰此陛下家事無須問外人帝意遂定而王皇后廢詔勣與于志寧奉冊立武氏

私謁撓權

肅宗立皇后張氏稍與政事與李輔國相助多以私謁

撓權帝不制遷太上皇居西內皆張皇后謀也寶應元年張后惡李輔國欲圖之程元振得其謀以告輔國乃幽后於別殿是夕肅宗崩

女相甚貴

章獻明肅太后成都華陽人少隨父下峽至玉泉寺有長老善相人謂其父曰君貴人也及見后大驚曰君之貴以此女也盍進京師乎贈以金百兩至京師真宗判南京因張耆納后宮中帝即位為才人進宸妃正位宮

聞聲滿天下仁宗即位以太皇后垂簾聽政時玉泉長

老已居長蘆矣

聞見錄

古今文集

雜著

后妃傳序

宋子京

唐制皇后而下有貴妃淑妃德妃賢妃是為夫人昭容  
昭儀昭媛脩容脩儀脩媛充儀充容充媛是為九嬪婕  
妤美人才人各九合二十七是代世婦寶林御女采女

各二十七合八十一是代御妻自餘六尚分典乘輿服御皆有員次後世改復不常開元時以后下復有四妃非是乃置惠麗華三妃六儀四美人七才人而尚宮尚儀尚服各三參合前號大抵踵周官相損益云然則尚矣禮本夫婦詩始后妃治亂因之興亡繫焉盛德之君惟薄嚴與裏謁不行於朝外言不納諸閭關雎之風行彤史之化修故淑範懿行更為內助若夫艷妻之興常在主第稠既交則情與愛遷顏詞媚熟則事為私奪

乘易昏之明牽不斷之柔險言似忠故受而不詰醜行已効反狃而為好左右附之僉壬甚之狡謀鉗其悟先哀誓鍵於寵初天下之事已去而恬不自覺此武韋所以遂篡弑而喪王室也至於楊氏未死玄亂厥謀張后制中肅幾斂衽吁可歎哉中葉以降時多故矣外有攻討之勤內寡嫵溺之私羣閹朋進外戚勢分后妃無大善惡取充職而已

冊皇后文

王安石

維熙寧二年歲次己酉四月丁酉朔二十六日壬戌皇  
帝若曰自昔有天下必擇建厥配以承宗廟以御家邦  
肆朕受命奉循前烈考慎冊典以祈協於神民咨爾向  
氏懿柔淑恭舊有顯聞肇功維祖弼亮帝室流德之澤  
覃延後嗣是產碩媛比賢姜任越朕初載來嬪藩邸盥  
饋在中率禮無違以至嗣服祇承內事齊明夙夜罔有  
曠失宜崇位號表正宮庭今遣攝太尉推忠協謀同德  
佐理功臣樞密使光祿大夫檢校太傅行尚書刑部侍

郎上柱國東平郡開國公食邑一千一百戶賜紫金魚  
袋王珪持節冊命爾為皇后夫惟興邦釐厥士女咸自  
內始達于四海朕克勤人用弗怠朕克儉人用弗奢朕  
克正人用無敢側頗僻爾勤相朕乃濟登茲於戲匪初  
惟艱惟慎厥終王忱念茲朕以永饗天祿爾亦豫有無  
疆之福豈不韙哉

賀冊皇后表

周必大

祲盛之禮發於宮闈騷康之聲播於寰海

中賀

共惟陛

下放古之憲刑家以身乃資婦德之良伴貳坤儀之政  
蓋關雎之求淑女以無險陂私謁之心雞鳴之得賢妃  
則有儆戒相成之道於以求助不專為恩臣生逢明時  
切觀盛事祝聖人之多子輒慕堯封思令德以式歌豈  
慙周雅



古今事文類聚前集卷二十